



S goot mii nyt a!

Won i au iiberaal due aneluege,
do gseen i, s goot bi uns e Männngs in d Hoose,
denn d Wält gheit immer mee ganz us de Fuege,
i wott s nit woor ha, wott au nimme loose.
Ins Guet im Mensch verlier i so my Glaube
und find bi all däm Chaos nimm dr Rangg,
sogar my gsunde Schloof duet s mir hit raube,
das ganz Drumumme macht mii physisch grangg.
Drum loos i nimm uf all das luti Gschrei,
mir länggt s, i mach jetz myni Auge zue,
blyyb ganz fir mii, denn bin i wider frei:
«s goot mii nyt a, leend mi aifach in Rue».

D Waale in unser Bundeshuus
sin fir mi allimool e Gruus,
denn s Waalpalaver bringt is nyt,
nur hoochi Keschte, Gschyss und Stryt.
Als stramme Basisdemokrat ...

... goot s mii nyt a – ych läb privat.

Die wichtigscht Faarb isch hitte grien,
sii isch es, wo mir wäale mien.
Die andere sin nimme gfrogt
und wär nit glyych dänggt, het s verboggt.
Drvoo grieg ych e roote Grind:

... s goot mii nyt a – bi farbeblind.

Mi Noochber findet s ganz verreggt,
wie dääglic är im Stau drin steggt.
Är glagt im Stäägehuus sy Laid,
doch wenn ych s heer, denn han i Fraid,
dass mir so ebbis nit bassiert.

S goot mii nyt a – bi pensioniert.

Jetz wott au no dr Grossi Root,
dass es esoo nimm wytergoot:
ab Zwanzigfuffzig soll kai Kaare,
wo Dyysel het, in Basel faare!
Die Utopie vo Grien und Root ...

... goot mii nyt a – denn bin i doot.

Defäggt an dr Theaterstrooss,
dr Säggser faart hit fiererlos,
am Eglisee sin d Weiche z wyt,
bim Warte bruuchsch enorm vyyl Zyt
und wenn si brämse, brichsch e Bai:

... s goot mii nyt a – i blyb dehai!

My Frind wott z Colmar demonstriere,
denn är het hit nyt mee z verliere:
kai Job, kai Woonig. Är fänd s s Beschte,
ych käämt au mit dr gäale Weschte.
Was soll i mit däm gäale Gschyss?

S goot mii nyt a – myni isch wyss.

Dr Donald Trump dääg alsfuurt bschysse
und jeede Daag e Frau uffrysse.
Dää untergrabt jeedi Moral;
die ganzi Wält findet s fatal.
D Moral beschäftigt schyynbaar d Lyt.

S goot mii nyt a – mir bringt si nyt.

Fir Pisa simmer bees im Dief,
bi uns isch nit nur ai Durm schief,
denn s Nyyvoo in dr Schuel isch myys,
und ooni Laischtig git s kai Bryys!
Doch all das rysst mii nimm vom Stuel, ...

... s goot mii nyt a – gang nimm in d Schuel!

Wenn d Sujetkommission sich quäält
und d Glyyge denne s Sujet wäält,
wo fir die Ainte z weenig luschtig
und fir die Andere eher fruschtig,
denn isch s mir glyych, was es jetz git, ...

... s goot mii nyt a – i dramp nur mit!

Dr Jordan sait mit schreegem Grinse:
«s git au in Zuekunft kaini Zinse».
Jä, Spaarsamkait bringt gar kai Nutze,
drum muesch dy Loon au gschwind verbutze
und d Spaarer mien sich halt gedulde.

S goot mii nyt a – ha hoochi Schulde.

Mit Brexit sin die arme Brite
ganz bees in Schyssdrägg yyne gritte.
Sii schleen sich jeede Daag an d Oore,
au s Pfund het vyyl vom Wäart verloore.
Ych liis kai Bricht iber dä Brexit.

S goot mii nyt a – ych gang mit Exit.

Fir Vyyli isch hit Basel doot,
will in dr Stadt gar nyt mee goot,
drum het d Regierig jetz s Besträäbe,
die Freyi Strooss ganz nei z belääbe
und maint, so wurd d Stadt wider geil:

... s goot mii nyt a – i kauf in Weil.

Nur an dr Fasnacht gang i uuse,
und verzicht drei Dääg uf s Pfuuse,
ha sogar e frächi Schnuure
und hoff, i heb die ganz Zyt duure!

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne sin
vom Määntig znacht bis am Mittwuch demoorge! Deert
und an de 3 Verkaufsständ (CINS) in der Stadt ka men
au alli Zeedel und Schnitzelbängg, d Blaggedde und
der Rädabäng kaufe.

Am Frytig und Samschtig, 6. und 7. Meerz
2020 isch wider die erschti Leggtion
fir d Noochwuggswärbig uf
em Barfi.